

## UNIDADE 5. ACTIVIDADES DE REPASO

- Responde as seguintes preguntas:
- Cita algunhas palabras galegas relacionadas etimoloxicamente con ὄρος e πλευρά
- Busca palabras gregas relacionadas etimoloxicamente con *cenotafio*, *crematística*, *hipoxeo*, *pedagogo*, *poesía*, *tesouro*.
- Busca palabras gregas relacionadas etimoloxicamente coas galegas: *cacofonía*, *acústica*, *hemeroteca*, *blasfemia*, *antropocéntrico*.
- Descubre con que palabras gregas están relacionadas etimoloxicamente as galegas: *endogamia*, *xinecoloxía*, *epistemoloxía*, *metropolitano*, *patroloxía*
- Escribe algunhas palabras galegas relacionadas etimoloxicamente con καρδίαν, ψυχὴν, βίον e οἶκους
- Define o significado de palabras galegas procedentes das gregas: ζῶα, ἐμπειρία, τέχνη, μνήμη, πράγματος, ἐπιστήμη.
- Indica helenismos galegos relacionados con κενῶ e διαλυόμενα
- Define o significado de *parataxe*, *mesolítico*, *sistema* e *heteroxéneo*; logo busca palabras relacionadas etimoloxicamente con elas.

GREGO II / Unidade 5. Actividades de repaso

## SOLUCIONARIO

Responde as seguintes preguntas:

- Cita algunhas palabras galegas relacionadas etimoloxicamente con ὄρος e πλευρά

**ὄρος**, *montaña*. Con *orografía* (cun segundo elemento -grafía de -γραφία, da raíz de γράφω *escribir*), '*parte da xeografía física, que trata da descrición das montañas*' e *orográfico*; *oroxénese* e *oroxenia* (con segundo elemento γένεσις e γένος *orixe*) '*parte da xeoloxía que trata da formación das montañas*' e *oroxénico* '*pertencente ou relativo á oroxenia*'. Todos os derivados anteriores son creacións da ciencia moderna, presentes en todas as linguas cultas, francés: *orogénie, orographie*; inglés: *orogenesis, orogenic, orographic, orographical, orography*; alemán *Orogenese, Orogen, Orographie*.

De **πλευρά**, *lado, costado*, temos en galego *pleura* '*cada unha das membranas serosas que en ambos os dous lados do peito dos mamíferos cobren as paredes da cavidade torácica e a superficie dos pulmóns*', *pleural* '*pertencente á pleura*', *pleuresía* '*enfermidade que consiste na inflamación da pleura*', *pleurítico* '*que padece pleuresía*' de πλευριτίς, *pleuritis* '*inflamación da pleura*' e *pleurodinia* cun segundo elemento ὀδυνή *dor* '*dor nos músculos das paredes do peito*'.

- Busca palabras gregas relacionadas etimoloxicamente con *cenotafio*, *crematística*, *hipoxeo*, *pedagogo*, *poesía*, *tesouro*.

Con *cenotafio* relaciónase τάφος, con *crematística* χρήματα, con *hipoxeo* ὑπόγαια, con *pedagogo* παῖς παιδός, con *poesía* ποιέω e con *tesouro* θεσαύρος.

- Busca palabras gregas relacionadas etimoloxicamente coas galegas: *cacofonía*, *acústica*, *hemeroteca*, *blasfemia*, *antropocéntrico*.

Relacionada con *cacofonía* κακῶς, con *acústica* ἀκούω, con *hemeroteca* ἡμέρα, con *blasfemia* βλασφημία e con *antropocéntrico* ἄνθρωπος.

- Descubre con qué palabras gregas están relacionadas etimoloxicamente as galegas: *endogamia*, *xinecoloxía*, *epistemoloxía*, *metropolitano*, *patroloxía*

*Endogamia* con ἔνδον, *xinecoloxía* con γυνή / γυναῖκα, *epistemoloxía* con ἐπισταμένην, *metropolitano* con μετρός e *patroloxía* con πατήρ πατρός

- Escribe algunhas palabras galegas relacionadas etimoloxicamente con καρδίαν, ψυχήν, βίον e οἶκους

Relacionados con **καρδίαν** *cardioloxía, miocardio, pericardio*; con **ψυχήν** *psique, psicoloxía, psiquiatría*; con **βίον** *anfibio, antibiótico* e con **οἶκους** *dioico, ecoloxía, economía*.

- Define o significado de palabras galegas procedentes das gregas: ζῶα, ἐμπειρία, τέχνη, μνήμη, πράγματος, ἐπιστήμη.

De **ζῶα** *protozoo*, literalmente, "o primeiro animal", o ser vivo máis elemental, dunha soa célula, ou varias iguais sen chegar a formar tecidos, e o medio da cal é a auga ou lugares húmidos.

De **ἐμπειρίας**, *empirismo*, teoría filosófica que sostén que a experiencia é a única fonte de coñecemento.

De **τέχνη**, *técnica*, o relativo ás aplicacións das ciencias e as artes e ao conxunto de procedementos ou recursos que a serven.

De **μνήμη**, *amnesia*, perda total ou parcial da memoria.

De **πράγματος**, *pragmatismo*, pensamento baseado principalmente na utilidade e valor práctico das cousas.

De **ἐπιστήμη**, *epistemoloxía*, doutrina dos fundamentos e métodos do coñecemento científico

- **Indica helenismos galegos relacionados con κενῶ e διαλυόμενα**

**κενῶ** *cenotafio*.

**διαλυόμενα** *diálise*

- **Define o significado de parataxe, mesolítico, sistema e heteroxéneo; logo busca palabras relacionadas etimoloxicamente con elas.**

**Parataxe**, coordinación de elementos do mesmo tipo gramatical e igual función sintáctica. Relacionado con τάξις. Outra: sintaxe.

**Mesolítico**, período de transición entre o paleolítico e o neolítico, a característica xeolóxica máis significativa do cal foi a desaparición da última glaciación. Relacionado con μέσον. Outra: Mesopotamia.

**Sistema**, conxunto de regras ou principios sobre unha materia racionalmente enlazados entre si. Relacionado con σύστημα. Outra: sistémico.

**Heteroxéneo**, composto de elementos ou partes de distinta natureza. Relacionado con ἑτέρως. Outra: heterosexual.